

**LJEKARSKA KOMORA
ZENIČKO – DOBOJSKOG KANTONA**

**P R A V I L N I K
O FINANSIJSKOM POSLOVANJU**

Zenica, 2. oktobar 2014. godine

Na osnovu člana 25. Statuta Ljekarske komore Zeničko – dobojskog kantona Skupština Ljekarske komore Zeničko – dobojskog kantona na svojoj redovnoj sjednici održanoj dana 02.10.2014. godine usvojila je

P R A V I L N I K O FINANSIJSKOM POSLOVANJU

I OSNOVNE ODREDBE

Član 1.

Ovim Pravilnikom uređuju se: izvori finansiranja, donošenje finansijskog plana i finansijskog izvještaja, finansijsko poslovanje, raspolaganje sredstvima i nadzor nad finansijskim poslovanjem te ostala pitanja od značaja za rad Ljekarske komore Zeničko – dobojskog kantona (u daljem tekstu: Komora).

II IZVORI FINANSIRANJA

Član 2.

Izvori finansiranja Komore su:

- upisnine,
- članarine,
- naknade za usluge Komore,
- dotacije, donacije i zavještanja,
- prihodi od izdavanja publikacija,
- ostali prihodi.

Član 3.

Prihode koje Komora ostvari isključivo može koristiti za finansiranje djelatnosti i aktivnosti i iste ne može raspoređivati članovima Komore.

Komora zaključuje ugovore i vrši druge pravne poslove i radnje u okviru djelatnosti koju obavlja.

U pravnom prometu sa trećim licima Komora odgovara imovinom kojom raspolaže.

III FINANSIJSKI PLAN I IZVJEŠTAJ

Član 4.

Skupština Komore usvaja Finansijski plan Komore u okviru godišnjeg plana i programa Komore.

Finansijski plan sadrži strukturu očekivanih prihoda i očekivanih rashoda za jednu poslovnu godinu.

Prijedlog Finansijskog plana Komore Skupštini dostavlja Izvršni odbor Komore.

Član 5.

Skupština Komore usvaja Izvještaj o finansijskom poslovanju Komore.

Izvještaj o finansijskom poslovanju Komore sadrži realizovane prihode i realizovane rashode u jednoj poslovnoj godini.

Izvještaj o finansijskom poslovanju Komore Skupštini dostavlja Izvršni odbor Komore.

IV FINANSIJSKO POSLOVANJE

Član 6.

Finansijsko i materijalno poslovanje Komora vodi u skladu sa odredbama Zakona i ovog Pravilnika. Finansijsko poslovanje Komore obavlja se preko žiro - računa otvorenog kod jedne ili više poslovnih banaka registrovanih na području Zeničko – dobojskog kantona.

Član 7.

Komora je dužna voditi poslovne knjige i sastavljati finansijske izvještaje za potrebe poreskih i drugih državnih organa, u skladu sa Zakonom.

Član 8.

Poslove iz člana 7. ovog Pravilnika za potrebe Komore obavlja eksterna knjigovodstvena kuća sa kojom Komora ima zaključen ugovor o pružanju knjigovodstveno - računovodstvenih usluga.

Član 9.

Višak prihoda nad rashodima Komora može oploditi na jedan od mogućih zakonskih načina.

V RASPOLAGANJE SREDSTVIMA

Član 10.

Odluku o raspolaganju finansijskim sredstvima Komore prema trećim licima u pravnom prometu donosi:

1. Skupština Komore – za sklapanje pravnih poslova čija je vrijednost veća od 20.000,00 KM;
2. Izvršni odbor Komore – za sklapanje pravnih poslova čija vrijednost ne prelazi iznos od 20.000,00 KM.

Član 11.

Izvršni odbor Komore odlučuje o raspolaganju finansijskim sredstvima Komore, u skladu sa finansijskim planom.

O vanrednim rashodima, koji nisu predviđeni finansijskim planom, odlučuje Izvršni odbor Komore.

Naloge za finansijska davanja iz stava 1. i 2. ovog člana potpisuje predsjednik Komore.

Član 12.

Organi Komore dužni su upravljati imovinom i sredstvima Komore sa pažnjom dobrog domaćina.

Svi pravni poslovi koji se preduzimaju u ime i za račun Komore zaključuju se po tržišnoj vrijednosti, odnosno pod uslovima koji su najpovoljniji za Komoru.

Član 13.

Član organa Komore ne može glasati u stvarima u kojima njegov imovinski interes, interes njegovog bračnog druga ili srodnika do trećeg stepena srodstva može biti u suprotnosti sa imovinskim interesima Komore.

VI NADZOR

Član 14.

Nadzor nad finansijskim poslovanjem Komore vrši Nadzorni odbor Komore.

Nadzor iz prethodnog stava vrši se najmanje jedanput godišnje, pred izradu završnog računa. Generalni sekretar Komore dužan je omogućiti Nadzornom odboru uvid u finansijsku dokumentaciju u vrijeme obavljanja nadzora.

Nadzorni odbor podnosi godišnji izvještaj o svom radu Skupštini Komore.

VII PRELAZNE I ZAVRŠNE ODREDBE

Član 15.

Ovaj Pravilnik stupa na snagu osmog (8) dana od dana usvajanja na Skupštini Ljekarske komore Ze-do kantona.

Ovaj Pravilnik je objavljen na web stranici Ljekarske komore Ze-do kantona <http://www.ljkzedo.com.ba>

Predsjednica Radnog predsjedništva

Zenica, 13.10.2014. godine

Broj: 01/S – 2I-371/2014.

Mersiha Mahmić-Kaknjo